

Morning Dogri (NSD) National News Bulletin 03-05-2025

आकाशवाणी

- प्रधानमंत्री नरेन्द्र मोदी होर अज्ज अंगोला दे राष्ट्रपति हुंदे कन्नै डेलीगेशन स्तरै दी गल्लबात करडन। इस मौके पर केई सारे समझौतें पर दस्तख्त कीते जाने दी मेद ऐ।
- सूचना ते प्रसारण राज्य मंत्री एल. मुरुगन अज्ज 'भारत दी लाइव इवेंट अर्थबवस्था: इक रणनीतिक विकास लाजमी' शीर्षक कन्नै अपनी किस्मै दा पैहला श्वेत पत्र जारी करडन।
- सेवाएं सरबन्धी खेत्तर च आई दी तेजी दे चलदे माली ब'रे 2024–25 च भारत दा निर्यात खेत्तर रिकार्ड 825 अरब डॉलर रेया।
- भारती वायु सेना नै उत्तर प्रदेश दे गंगा मोटरवे पर अपना दमखम दस्सेआ। भारत च जरनैली सिडकै पर पैहली बारी रातीं'लै ज्हाज तोआरने दी उपलब्धि बी कीती हासल।
- ऑस्ट्रेलिया च संसदी चुनाव लेई मतदान जारी ऐ। प्रतिनिधि सभा दिएं सभ्भन 150 सीटें ते सीनेट दिएं 76 चा 40 सीटें लेई वोट पाए जा'रदे न।
- आईपीएल क्रिकेट च जंदी रातीं अहमदाबाद च होए दे मुकाबले च मेजबान गुजरात टाइटन्स नै सनराईजर्स हैदराबाद गी 38एं रन्जें कन्नै हराई दित्ता।

<><><><><><>

PM Talks

प्रधानमंत्री नरेन्द्र मोदी होर अज्ज नमीं दिल्ली च अंगोला दे राष्ट्रपति जुआओ मेनुअल गोजाल्विस लोरेंसियो हुंदे कन्नै प्रतिनिधिमंडल स्तर दी वार्ता करगन। बक्ख-बक्ख खेत्तरें च दपक्खा सैहयागे बधाने दी गल्लबात दे बाद दौनें दे बश्कार केई समझौतें पर दस्तखत होने दी मेद ऐ। अंगोला दे राष्ट्रपति भारत दी त्रै दिनें दी यात्रा पर कल नमीं दिल्ली पुज्जे हे। राष्ट्रपति लोरेंसियो हुंदा अज्ज राष्ट्रपति भवन दे प्रांगण च औपचारिक सुआगत कीता गेआ। ओह राष्ट्रपति द्रौपदी मुर्मू हुंदे कन्नै गल्लबात करगन। राष्ट्रपति मुर्मू हुंदे सम्मान च अज्ज रातीं विशेष धाम दा आयोजन करगन।

<><><><><><>

WAVES White Paper

सूचना ते प्रसारण राज्य मंत्री एल. मुरुगन होर अज्ज भारत दी लाइव इवेंट अर्थबवस्था: इक रणनीतिक विकास लाजमी शीर्षक कन्नै अपनी किस्मै दा पैह्ला श्वेत पत्र जारी करडन। श्वेत पत्र भारत दे तेजी कन्नै बधदे लाइव मनोरंजन उद्योग दा व्यापक विश्लेषण पेश करदा ऐ। एह्दे च उभरदे रुझाने, विकास मार्गे ते खित्ते दे लगातार विकास-बाददे लेई महत्वपूर्ण सफारशें पर लोऽ पाई गई ऐ। वेक्स दे दरान मीडिया ते मनोरंजन खेत्तर 2024-25 पर आंकड़ें सरबन्धी इक पुस्तिका बी जारी कीती जाहग।

<><><><><><>

Waves Community Radio

मुंबई च चलै करदे वर्ल्ड ऑडियो विजुअल एंड एंटरटेनमेंट समिट वेक्स 2025 दे त्रीए ध्याड़े अज्ज समुदायिक रेडियो पर राष्ट्रीय सम्मेलन दा सरिस्ता कीता जाग। जेह्दे च नमें रुझाने, तौर तरीके, नीतिएं ते कार्यक्रमें बारे बचार बंटादरा कीता जाग। एह्दा मकसद समुदायिक रेडिया राएं लोकें गी जागरूक ते सशक्त बनाना ते मकामी समुदाय कन्नै मते बेहतर ते असरदार ढंगे सिर जुड़ने दी छमता च बाद्धा करना ऐ। एह् समुदायिक रेडियो स्टेशनें गी इक दुए कन्नै जुड़ने, सिक्खने ते बेह्तरीन तौर तरीके ते परम्पराएं गी सांझा करने लेई इक मंच प्रदान करोग। एह्दा आयोजन सूचना ते प्रसारण मंत्रालय आस्सेआ भारतीय जनसंचार संस्थान दे सैहयोग कन्नै कीता जा'रदा ऐ।

<><><><><><>

WAVES

मुंबई च विश्व ऑडियो विजुअल मनोरंजन शिखर सम्मेलन- वेक्स 2025 च, क्रिएट इन इंडिया चैलेंज दा पैह्ला गेड़ कल संपन्न होई गेआ। एह्दे तैह्त्त 32 बक्ख-बक्ख प्रतियोगिताएं दे जेतूएं गी सम्मानित कीता गेआ। एह्दे च मीडिया ते मनोरंजन उद्योग दे एनीमेशन, गेमिंग, फिल्म निर्माण, आर्टिफीशियल इंटेलीजेंस, संगीत ते डिजिटल कला सने हर खेत्तर गी शामिल कीता गेआ। इ'नें प्रतियोगिताएं च 60 शा मते मुलखें दे इक्क ज्हार इक्क सौ शा मते अंतरराष्ट्री प्रतिभागियें दे कन्नै इक्क लक्ख शा मते लोकें पंजीकरण करोआया।

एह्दे'नै उभरदी ते युवा प्रतिभाएं दी जीवंत सृजनात्मकता प्रदर्शित करने लेई इक वैश्विक मंच मिलेआ। सूचना ते प्रसारण मंत्री अश्विनी वैष्णव होरें इसी ऐतिहासिक पल करार दि'दे होई दस्सेआ जे पैहली बारी सृजन खेत्तर च कोई पुरस्कार दित्ता जा'रदा ऐ। उ'नें आखेआ जे इस पैहल दे कन्नै, निर्माता नमें मौकें दी दुनिया च गैह् रक्खा करदे न। श्री वैष्णव होरें आखेआ जे वेव्स नै युवा रचनाकारें गी प्रतिभा दस्सने दा मौका प्रदान कीता ऐ। उ'नें इब्बी गलाया ऐ जे एह् सम्मेलन मीडिया ते मनोरंजन दे खेत्तर च इक्क प्रमुख उपलब्धि साबत होग। सूचना ते प्रसारण राज्य मंत्री एल मुरुगन होरें आखेआ जे एह् मंच युवा प्रतिभाएं दी रचनात्मकता गी तकनीक कन्नै जोड़ने दी बड़ी खूबसूरत मिसाल ऐ।

<><><><><><>

India Export

भारत दा कुल निर्यात माली ब'रे 2024–25 च लगभग 825 अरब डॉलर रेआ, जेह्ड़ा सब्बने शा उच्च स्तर उप्पर पुज्जी गेआ ऐ। एह्दे च मार्च 2025 दी सेवा बपार बी शामिल ऐ। रिजर्व बैंक दे नमें आंकड़े मूजब एह्दे च पिछले ब'रे दे 778 अरब डॉलर दे मकाबले 6 प्रतिशत थमां मते दा बाद्धा होआ ऐ। सेवा निर्यात साढ़े 13 प्रतिशत शा मता बधियै 387 अरब डॉलर होई गेआ ऐ। जेह्ड़ा अजें तगर दा सब्बने शा उच्चे स्तर उप्पर ऐ।

<><><><><><>

Air Force

भारतीय वायु सेना नै कल उत्तर प्रदेश दे शाहजहांपुर जिले च गंगा एक्सप्रेसवे उप्पर साढ़े 3 किलोमीटर लम्मी हवाई पट्टी उप्पर इक बड़डा अभ्यास कीता। एह्दे च हवाई सेना नै अपनी डोआरी छमता दा शानदार प्रदर्शन कीता। अपनी किस्मां दे पैहले प्रदर्शन च हवाई सेना दे रफाल, जगुआर, मिराज 2000, सखोई–30, एमकेआई ते मिग 29 जनेह् आधुनिक जहाजें हिस्सा लैता। युद्ध दरान आपातकालीन अभियानें ते कुदरती आपदाएं दे समें हवाई पट्टी गी मतवादल रन–वे दे तौरा पर ओह्दी दक्षता गी जांचने लेई एयर शो दा आयोजन दिले ते रातीं दे समें च कीता गेआ। इस मौके उप्पर उत्तर प्रदेश दे मंत्री दानिश आजाद अंसारी होरें गलाया जे उत्तर प्रदेश रातीं दे समें च एक्सप्रेसवे उप्पर लड़ाकू जहाजें गी तोआरने दी छमता आला देश दा पैहला राज्य बनी गेआ ऐ।

<><><><><><>

Australia Polls

ऑस्ट्रेलिया च संसदी चुनाएं लेई मतदान जारी ऐ। प्रतिनिधि सभा दिएं सभ्भनें 150 सीटें ते सीनेट दिएं 76 चा 40 सीटें लेई वोट पाए जा'रदे न। सत्ताधारी लेबर पार्टी दे मजूदा प्रधानमंत्री एंथनी अल्बनीज़ दुए कार्यकाल लेई फही चुनां मैदान च न। उं'दा मुकाबला कंजर्वेटिव लिबरल-नेशनल गठबंधन दे नेता पीटर डटन कन्नै ऐ। एह्दे अलावा, ग्रीन्स पार्टी दे नेता एडम बैङ्ट बी मुकाबले च न। खरी मती गिनतरी च लौह्की पार्टियां बी चुनां लड़ै करदि'आं न। अधिकारिक नतीजें लेई केई दिन लग्गी सकदे न। लेबर पार्टी 2022 च 9वें ब'रें परैन्त सत्ता च परतोई ही।

<><><><><><>

Goa Stampede

हूनै हूनै थ्होई दी इक खबर मताबक गोवा दे शिरगांव इलाके च इक धार्मिक जलूस दरान मची दी भगदड़ च 6 लोकें दी मौत ते 50 शा मते लोक जख्मीं होई गे न। जख्मि'ए गी अस्पतालें च भर्ती करोआई दित्ता गेआ ऐ। गोवा दे मुख्यमंत्री प्रमोद सावंद होरें मापुसा जिला अस्पताल जाइयै जख्मि'ए कन्नै मलाटी कीती ते उ'नें हर मुमकन मदाद दा भरोसा दित्ता ऐ। तोआई प्रधानमंत्री नरेन्द्र मोदी होरें इस हादसे च कीमती मनुक्खी जानें दे नुक्सान पर दुक्ख ते बसोस जताया ऐ। सोशल मीडिया दी इक पोस्ट च श्री मोदी होरें जख्मि'ए दे तौले नरोए होने दी कामना कीती।

<><><><><><>

IPL

आईपीएल क्रिकेट च जंदी रातीं अहमदाबाद च गुजरात टाइटंस नै सनराइजर्स हैदराबाद गी 38 रंजें कन्नै हराई दित्ता। पैहले बल्लेबाजी करदे होई गुजरात टाइटंस नै 6एं विकटें दे नुक्सान 20एं ओवरें च 224 रंज बनाए। अज्ज बैंगलुरु दे एम.चिन्नास्वामी स्टेडियम च रॉयल चैलेंजर्स बैंगलुरु ते चेन्नई सुपर किंग्स बशकार संजा साढ़े 7 बजे मैच खेड्डेआ जाग।

<><><><><><>

IPL

आईपीएल टी-20 क्रिकेट मैच च पंजाब किंग्स नै जंदी रातीं चेन्नई दे एम.ए.चिंदबरम स्टेडियम च खेड्डे गेदे इक मकाबले च चेन्नई सुपर किंग्स गी चऊं विकटें कन्नै हराई दित्ता। अज्ज राजस्थान दा मकाबला जयपुर दे सवाईमान सिंह स्टेडियम च मुंबई इंडियन्स कन्नै संजा साढ़े 7 बजे शुरू होग।

<><><><><><>